



林下筆記

三十三冊

卷之十七

文獻指掌 七





林下筆記卷之十七

文獻指掌編目錄七

學生青衿團領

瘦鷹宰相

安坦大貂裘

革帶佩刀

冠制

中原笠制

羅濟笠

笠樣

平涼子

笠子之變

冲正冠盛行

木鞋

折風笠

學生宦者掾吏衣服

網巾

器服皆古朴

帖裡之制

道袍之源

孔廟女像

長衣

蓋頭

大帽簷垂

環珥

編髮

婚禮新婦服

髮髻

婚禮白馬

禁加髻

中古婦女出入

雙轎

轎裏三面

來軒

國寶

體天寶

施命寶

鏡城得古印

提督印

壬辰後印信鑄造

權署國事印

皇賜印迹

原州得古印

昌城得古印

寶式

圖書

牙牌

御題詩

文宗勤學

敬卿無異叔父

親書知事第一四字

授以御被

孫舜孝製進事大表

袖柑隨地

賜杯讀書堂

遣承旨問疾

尚震醉外

畫進陶山精舍

撰聖學十圖

大臣遭憂恤典

思庵喜牛翁登朝

賜物大臣母

肩輿入闕

禮賢

小學諺解

勸鄉飲酒禮

讀約

旌孝烈

子死父喪妻從夫死議

召吉再

享鄭圃隱

善竹橋詩

忠臣之像移摹於忠臣之宅

徐甄遜居詩

咸興差使

抗義新編

孝廟誦圃隱詩

不朝覲

罷寺刹

拜佛

不受僧施食

斥閻羅之說

毀淫祠

聖痘遠巫祝

禁僧徒入城

五禮儀

喪禮補編

李廷龜請成昭代典則

鑄字

命刊文集

證周易設廳

選東詩設廳

頒諸書

校書院

小學重刊

大字九經

濟州藏書

木版鑄字之辨

劉玄子說東國冊子

購綱目

大明會典輯註

羣書求來

石齋筆談

朱彛傳文

古文孝經

朝鮮志

中朝求觀東國文籍

華史中記東事

方言解九經

青丘風雅

東方之文符

文體

金時習書

思政殿訓義

治平要覽

歷代兵要

諸書類聚

東國通鑑

春秋類聚

經旨兩存之

獻芹錄

東人詩集之盛

歌曲

前朝秘史

壬辰後修史議

仁祖朝改修宣祖實錄

時政記

史庫

赴京却僧徒於班序

陪臣許入正門

詔使到京變禮

親年七十不赴使

黃驍宰相

武臣奉使

獻建州捷

質正官

德宗進崇奏請

使臣遊觀出入

迎恩門

梅燕圖


西伯迎勅

東使優待

華使之賢

皇朝遣太監封王

天使一代名人



林下筆記卷之十七

月城李裕元景春輯

文獻指掌編

學生青衿團領

成宗八年輪對官白勛請令館學生服青衿團領
經筵事金國光曰先朝嘗欲行此而未果今使儒生
異服則居館者必少矣上曰儒生而恥儒服是恥學
聖人之道也其可乎知經筵事李克培曰若使之戴
笠而服青衿必易從也上可之董越朝鮮賦云制履
以皮錐泥行亦雨不恤襪縛於袴緼水涉亦雨不抱

又曰五色各隨所用所禁者紅自註云以王服御皆用故禁之又曰民戴草帽領皆垂珠頂或圓方色皆黑纁皂與剛穿四葉青衫頂加挿羽庸人剛衣穀重麻布步曳長裾又曰衣皆素白而布縷多虛裳則離披而襍積亦疏

瘦鷹宰相

成俛曰許稠嘗判禮曹定上下服色儀制截然有分輕薄子深疾之諺曰瘦鷹宰相

安坦大紉裘

鄭載崙公私見聞曰安坦大中宗朝後宮昌嬪之父

也持身謙謹雖隣居小兒到門詰責只遜謝而已及
嬪生王子女杜門不出恐人或以王子外祖家稱之
及宣廟承統處地尤尊貴而心不寢身不著紬緞老
而失明宣廟欲以尚方所進貂裘賜之而恐違雅意
使人試之坦大曰我是賤人著貂裘死罪違上命亦
死罪等死無寧安分而死上知其意不可奪命家人
以稱兒狗皮以進之坦大以手摩之曰尚方之狗有
別種耶皮之柔細何至此耶為加於身云

革帶佩刀

李濟臣曰近世國俗皆著革帶好帶佩刀或者兵革

之象歟

冠制

李濟臣曰近年卿士平居咸好看冠以代笠子其冠制式程子式朱子式濂溪式東坡式冲正式方巾其類頗多已巳余赴京時序班許繼儒見所著曰此冲正巾非冠也余曰冲正巾冠其制異乎許曰頂上平方四隅有稜者是巾頂上偃圓有高低起伏如雲狀倣梁冠體而四面困轉無隅者卽冠也余買其冠制到本國授之帽工使依樣制造我國冲正冠始此

中原笠制

趙憲東還封事曰中原雖有笠制而人不能備其出入之際文官著忠靜冠武官著毛帽而有簷儒用儒中或著方巾吏用吏巾常人皆著帽子而東方人人不論貴賤通戴笠子虛費重價若從華俗使吏士常著其中庶人只戴帽子則窮人庶無費價買笠之患矣

羅濟笠

李晬光曰羅濟笠不知所始以名覩之疑出於新羅百濟時也按高麗史辛禔元年始令各司胥吏著白方巾本朝為外方吏人所著而黑之壬辰變後久廢

不復崔有源為京畿監司首令營吏依平時着羅濟
笠吏等苦之未幾還廢

笠樣

尹國馨曰近世笠樣臺低坪廣衣袖甚窄見有高笠
濶袖則人稱古體而笑之至有國令勸行古體而不
從衣亦士庶尚白明宗朝曹植上疏有音衣服素之
語故洪曇為大司憲庸禁白衣士人以上表單衣皆
用桃紅行之五六年還止宣廟初年許魏天使所着
紗帽直而高衣短袖濶舉國效之笠制亦因而臺高
坪狹至十年間紗帽頂上微蹲平衣袖之濶稍減臺

亦暫低此則國無所令而自爾如是也亂生之後中原將士遍滿國中朝訖宜倣唐制啓請士族以上着笠下賤去笠著小帽而亂離之中非但未暇修飾窮民亦以備帽為難且扭舊習脫笠相視頗以為羞法司禁令亦嚴民猶不從或在家着笠出門便脫又或路上脫笠潛挾脇傍入門還着甚矣習俗之難變也

平涼子

趙克善曰我國民庶舊皆戴平涼子其制織弁為之而素其體唯驛卒黑而戴之俗稱兩班為黑笠者以民庶所着平涼子色素故也壬辰之亂有言倭賊遇

兩班則必殺無貸一時大小人皆戴平涼子唐將恠
而問之對者曰君父播越臣子不忍服羞以庶人自
處唐將不知其權辭而聞而善之云西北人多戴毛
氊笠蓋近胡俗也自戊午度遼之後興國中多有戴
毛氊笠者轉相視效遍及四方丁卯寢後士大夫亦
或戴之武人則雖大官無不盡然毛氊笠或謂之戰
笠此乃戰爭之兆也歟

笠子之變

趙克善曰我國士庶所着笠子臺上高低隨時變易
清江瑣語曰冠帶衣服之制因時尚好遷就變易潛

與世道相符中廟末年士庶常著笠樣臺上極重享
高大坪兒極狹時人謂之冬瓜臺上切餅坪兒猶有
古人朴實底意思明廟初金舜臯為慶尚右兵使以
前笠制不安於暑雨懼執舊制增損其體甚輕快一
時好之其體立變時人亦謂之金舜臯體其後漸至
頂顛極低如覆食鉢蓋子邊坪極廣幾張小傘宛如
僧笠帶亦好著廣多繪亦僧家所著也未久復兩宗
禪科佛教大行此實其兆也云又自宣廟中年笠制
復高其頂至于末年頂極高邊極狹光海初年以後
漸變其制遂至於邊極廣頂極低則乃所謂覆子臺

上安盤坪兒近數年之間笠制又變而其變有漸初
不覺其為然又不知自何人始變而癸未甲申年來
臺上突然高大坪兒則仍其極廣未知胡然而然也
許筠曰我國男子所著笠兒乃古所稱曲柄笠謝臨
川所喜戴者

冲正冠盛行

許筠曰國俗常時着笠子之外更無他着矣李浚慶
兄弟慕華制買於中原喜着冲正瀛溪等冠人慕之
至今盛行

木鞋

李星岭曰宣廟庚子年間木鞋始出於南中而遍於國中

折風笠

李灝曰東俗以笠子及白布道袍為最尊之服古云通用笠子之制源於折風笠折風者今為遺喪之用禮不忘本也後張其四檐為平涼子又平其頂而漆之皆後出尤工而折風之名沒焉我東首被箕子之化變為冠帶之邦箕子殷人殷尚白故東人至今衣必尚白有由來也亦安知折風之非殷冠耶禮云夏收殷俾註云俾之名出於慤慤覆也所以自覆飾也

折風乃東方最古之服而亦廣檐深覆冠之有覆只此物為然則不可謂無考也

學生宦者祿吏衣服

趙憲曰見中朝衣冠之制幘頭軟脚名曰鴈翅紅袍青袍襖積一如道袍而整齊端嚴儒巾之名或曰民字巾或弁結而裹以緇布或紙糊而著漆其體端平不甚尖斜舉人及武學生俱服儒巾黑團領中外學生俱服襖衫蓋玉色而緣以青絹東士之所謂青衿者與此大異宦者之巾弁結布裹形如帽子有職者有檐無職者止着帽子但以布自前裹之垂其餘于

項後所服之衣或穿帖裡或穿衣撒直領帶用細條
兒雖侍立于榻前者止服此衣祿薄之宦亦所易備
文武庶官皆佩牙牌以記職名而俱黑其綬宦者則
亦以別之雖遠郡掾吏中如書吏而稍高俱服團領
蓋守令冠帶聽事則吏不敢不服其服而我國外邑
之吏俱無禮服甚不如人形平壤義州等處吏服相
同各司之吏他邑若令依此改之則雖刀笔之賤俱
嚴禮服而庶無怪僻之習矣

網巾

李時光曰網巾古無其制大明初道士所為也太祖

命頒天下使人無貴賤皆裹之諸國中唯琉球人著
中帽而其使臣問我國譯官曰貴國常時著網巾否
答曰以無貴賤常著云則使臣吐舌曰我國人則常
時不著云以此觀之中朝外唯我國人著網巾他國
則不然矣董越朝鮮賦曰人露總環以分貴賤自註
云其國總髮之網巾皆結以馬尾以環定品級一品
至二品金三品以下銀庶人則骨角銅蚌之類

冠服皆古朴

李暉光曰我國衣服冠屨體制多襲唐舊聞中朝儒
士呂英命言中原有蓄古冠古服者知爾國皆唐制

古朴可觀云識小錄曰我國衣帽冠物多古制男女所履足中即古所謂襪也戎服帖裡即褶袴也

帖裡之制

南鶴鳴曰我國帖裡之制最近於深衣故中古多爲文士便服蓋爲燕服之上衣而朝服之中衣至于今日專爲戎服而非武士及臨陣則不服此衣未知其故許龜城與善暉之庶曾孫也嘗言其曾祖遷葬改棺時見之則襲用帖裡而上衣太長下裳太短異於今人之所服云以此推之知禮之士亦不嫌於送終可知矣

道袍之源

李漢曰道袍者據通考卽古大裘之制非遐裔之制造而見於周禮周之禮必雜用前古之制以東俗推之亦或是殷制也余故曰豈子道袍及婦人雙紒繞首皆從箕子而東者也禮者所以不忘本也祭用此物其仅當然也今礼重幅巾深衣幅巾源於東京初非古制東俗不樂則不必用也深衣必須廣布東俗布幅不廣費廣然後可得孔子居魯縫掖居宋章甫從時也既不可廢豈子則何必深衣而後可乎

孔廟女像

太宗朝欲令本國女服悉從華制許綢啓曰臣昔赴京過闕里入孔子家廟見女服畫像與本國無異但首飾異耳事遂寢

長衣

世祖元年梁誠之上疏禁女服長衣以別男女之制也

蓋頭

古者婦人出入無蓋頭奇虔創新樣以進後世遵用之趙克善曰我國婦人以玄錦或紫錦全幅二尺二寸中屈之為兩重以厚紙帖其裡而戴之從額覆頂

垂于後以加肩背謂之遮額自光海中年來率用玄
錦為表以絮為裡而空其中貼戴頭上而謂之簇頭
里一時好尚遂變國俗遮額之制絕無矣英宗三十
五年禁婦女加髻代以簇頭里後還撤禁令復舊髻
髻而嚴禁高大侈靡之習

大帽簷垂

曹伸瓚錄云東方士族婦女出外皆以皂羅蒙圓笠
四垂尺餘而戴之所以擁蔽其面蓋唐幕帷帽之
遺制或謂蓋頭識小錄曰士族婦女所戴遮首即古
所謂帷帽新婦牢宴所戴捲首即詩所謂副笄六珈

也

環珥

宣祖五年教曰我國大小男女必穿貫其耳作環珥而懸之取譏於中國甚可羞愧自今後一切痛革全柱臣曰身體髮膚受之父母不敢毀傷孝之始也我國男女之貫穿其耳取譏中國亦可羞愧自今曉諭中外痛革胡習大哉王言真可以化民成俗也今則男子懸珥之習知者蓋鮮而閩西婦女則尚有穿耳之俗矣以宣廟取譏之教觀之中朝之人皆不穿耳而按莊子德充符曰為天子之諸御不剪爪不穿耳

是則蓋自上古已有此風矣

編髮

趙憲東還封事曰中國男童不編其髮十五以下則剪而垂之十五以上則總於頂後待二十然後乃冠女人既嫁者束髮於頂而加以髻髻背子背子袖甚濶而無長衣其長裙不施釵短其衣冠靚莊而猶有儉約之俗如此臣路見向化獠子之婦又見進貢廻還之輩我國童男及婦人歛髮之容不韋近之

婚禮新婦服

李漢曰今之婚禮新婦服褰衣濶袖大帶長裙卽中

華之制按三國史宋史劉達等來見鄉莊倡女潤袖
衣色綠帶大裙曰此皆三代之服不意尚行於此卽
今新婦服是也前此真德王時金春秋入唐請襲華
制受衣帶而還以夷易華至文武王四年革婦人之
服同於華制文武王卽太宗王春秋之子也切切慕
華至是盡變男女之服可謂盛矣今之婦女穿袖短
衫不知何自而貴賤通用殊可駭異安鼎福曰我國
婦女之服衣裳不連而衣短不掩腰元世祖變易中
國之俗男為袴褶穿袖女穿袖短衣下服裙裳意者
此時從元制而後遂因循至今不變也又曰今俗婚

禮時首飾江長衫之制出於明昇云

髮髻

安鼎福曰婦人之飾惟髮可別故以髮為重周禮王后之首飾有副編次註副之言覆也所以覆首為飾若今步搖編則編髮為之若今假髻次者髮髻次第髮長短為之則必相續而為髻也謂之有旗則繞而猶有餘也謂之如蠶則卷屈以回轉如蠶尾之曲也按士婚禮女盛服必用次次之為婚禮之飾可知易曰帝乙畋妹婚禮乃殷湯所制故至周必用殷禮不忘本也庶婦之禮不應異例髮髻之本於殷禮亦可

知之

婚禮白馬

我邦是箕子之肇基箕子殷人猶守舊俗故忠宣王之婚禮也以白馬八十一匹為贄幣流俗之傳至今未泯凡士庶之婚必求白馬可以見之矣

禁加髡

正宗十二年十月教曰最是宜革而易祛者莫勝於加髡故曰禁加髡即明聖志紹盛烈之一端云爾然因朝廷之不一齎志多年迄今因循近幸鴻臚抗論端揆繼陳予一聞而犁然再聞而漠然今遂乃歷詢

大臣諸臣斷而決之大抵加髻之為樣見於禮經乎
法書乎泝其本本非美制始也緝髮之容便成重首
之飾爭尚夸大滋致翔貴汰靡者不顧傾產貧窶者
幾至廢倫弊斯極矣在所矯救國中婦女加髻一切
革祛節目中代髻之式娘子雙髻絲陽髻係是嫁前
之制不可用之以編髮後髻為之頭上所戴段依前
以簇頭里為之母論綿絮涼竹皆以黑色外裹

中古婦女出入

南陽洪氏家乘云我國禮法甚嚴士人之妻不敢乘
有屋轎中古猶存此風而子後雖宰相家婦人往往

乘馬李廷龜孫婦來覲騎驢監司洪命一長女進士
趙相鼎妻往來舅家乘馬或驢以羅兀蔽面羅兀以
紗垂四面掩面覆肩

雙轎

肅宗三十七年黃海監司鄭是先以乘轎難安陳疏
金昌集曰受教中雖曰堂上官曾往承旨則乘雙轎
未往承旨則乘獨轎南武不可乘云而頃日尹乾商
以巡撫使出去事體與方伯相敵故臣以乘轎為無
妨矣官至監司留守則雖南武宜有不可乘之理乎
上曰監司留守異於他職許令乘轎

輜褕三面

許厚曰平時監司騎獨輜暑月則去帳以日傘隨日影所及而遮之寒日則垂四面帳而行近間三面去帳不知其為犯僭於御輦云

乘軒

英宗二十三年時有以蔭同樞者乘軒上曰繁纓小物也而夫子惜之朝著等威不可紊也非曾經京兆亞尹同敦寧者毋得乘軒著為令

國寶

南九萬曰朝鮮國王之印卽大明高皇帝頒賜我太

祖開國之初者繼及累朝凡於臣僚皆用此印當其時專心事大國無他寶可知

體天寶

世宗大王欲用欽賜體天牧民永昌後嗣為寶難其書篆者朝廷薦姜希顏使書之

施命寶

成宗二十四年命官教用大寶賜牌用施命之寶

鏡城得古印

曹伸瓊錄曰成宗乙巳冬鏡城人耕田得古印以獻其篆文曰引進使印兩隅刻云天泰四年記上令弘

文館考之引進使則高麗官名而天泰則元遼金史皆無考云裕元按天泰金之部落富鮮萬努年號以金宣宗貞佑三年十月改

提督印

宣祖三十一年天將水軍都督陳璘以本國統制使李舜臣戰功奏聞于皇朝帝賜舜臣提督印至今藏于本營

壬辰後印信鑄造

宣祖三十三年李恒福啓曰中外各衙門印信徑度以後從其散失一不修造或用木印印迹易刻體制

亦簡殊非所以傳信防奸之意也稍待天兵盡回京中撫安亦令該官鳩集材料及時鑄造宜當

權署國事印

光海初禮曹啓先王朝權署國事印寶有無考之太廟各室所藏璽寶則皆無權署之寶今此告訃請謚表奏仍前當用白文而大妃奏文則既有嘉禮時刻以王妃之寶當用此寶而寶字恐有所諱此亦似難用之似當以朝鮮國王妃之印新造安下似合權宜從之

皇賜印迹

肅廟朝得皇朝成化年間所賜印迹於槐院故紙中
教以此模刻作金寶藏置而用之蓋欲使後世子孫
受此室而嗣位以毋忘皇朝罔極之恩

原州得古印

英宗十四年江原監司進古印一顆啓曰原州民於
田疇得古印印文曰同簽大宗正事印後面刻天成
天成即後唐明宗年號而新羅景哀王三年

昌城得古印

英宗二十一年平安道昌城府民耕田得古印一顆
背刻萬曆幾年造蓋丁卯之亂府使金時若戰亡時

見失者也府使李衡身牒報上送于監營監司李宗城回關下送使之寶藏本府

寶式

英廟王世孫冊封時冊封都監啓曾於教命安施命之寶而今此所下之寶卽朝鮮王寶也與前有異不可不明白稟承永作後制上曰此寶欲用於此摸古本而令尙方造入以此安室此後永爲定制大室刻朝鮮國王之印安事大咨文施命之室安教旨與教書昭信之寶英宗乙酉更稱以德室安通信國書諭書之室安諭書

圖書

世祖九年命刻草啓字圖書印啓下文書以為標十一年教曰凡分軍命將發兵等事頒考制勝圖書凡啓下公事考啓字圖書凡問字公事某啓公事等考定字圖書

牙牌

正宗朝奎章閣牙牌有三其一一面篆刻奎章閣三字及御署一面篆刻命字依宋朝殿閣學士牙牌宣召例每當宣召在直閣臣請出其一篆刻內府書籍命八牌置大內其一篆刻內府書籍請出牌置本院

凡有書籍命入或請出之時必填其書名而請出時則必書請出閣臣姓名

御製詩

太宗嘗作扇詩曰風榻倚時思朗月月軒吟處想清風自從削竹成團扇朗月清風在掌中

文宗勤學

文宗久在承華沉潛學問每月明人靜或手携一卷步至集賢直廬與之問難時成三問等諸臣直處夜不敢輒解冠帶一夕宵刻將半謂鶴駕不復出脫衣欲眠忽聞戶外有曳履聲呼謹甫而至乃文廟也講

論極歡而罷謹甫成三問字也

敬卿無異叔父

世祖於鄭昌孫深如眷注嘗曰予之敬卿無異叔父如值進爵上必改容下御座曰此非君臣大義乃展私禮也仍宣諭在座群臣昌孫性不能酒座上為設醴必親嘗賜之至年深難於趨拜或命免拜上殿其尊禮敬重如此

親書事知第一四字

世祖寵待金国光擢拜兵曹叅判專委戎政每稱如國光者真文武全才也親書事知第一四字以寵之

一日御便殿手匙御飯賜公食傾日角襯其面謂老
宦安璐曰祖宗朝君臣相得亦有如是者乎對曰歷
事四朝未嘗見如今日者戊子元日會禮宴時舊制
首相押班進爵而特命國光以左贊成進爵蓋特恩
也

授以御被

成宗朝俞好仁在玉堂成廟恩顧特優學士無比每
月夜從宦者數人遊慶會樓池中小舟僅受五六人
獨俞好仁從之有若唐玄宗之待謫仙也好仁以校
理豹直上從小宦一人夜臨直廬好仁驚起俞只着

紗帽而坐從容談論上見其衾藥露絮貢染色退上
曰爾歷官清安儉素如此可尚也禽宦者持御被來
因以覆之而還

孫舜孝製進事大表

成廟寵待孫舜孝甚至一日以大提學命召使製進
事大表文晚後舜孝始至露髮不歛酒氣滿面上曰
卿既醉恐不能作文招提學與之撰定舜孝固請結
撰且書副本上撤御硯與之舜孝湏臾而就文不加
點筆無可刊上大嘉卽付承文院封裹以送仍命供
宴以樂之又呼韻賦詩命宮人彈琵琶而歌之極歡

俞舜孝起舞舜孝醉倒上鮮藍錦段帖裡以覆之

袖柑墮地

成廟朝成希顏以弘文正字丁憂制閤謝恩上召至
閤門外勞之舍中官臂一鷹以賜曰爾有老母公退
有暇可以郊獵助供滋味又入夜對賜酒果希顏袖
柑橘十數枝因醉伏不省中官負出之袖柑墮散于
地明日下柑橘一盤于玉堂教曰昨日希顏袖橘意
欲遺親故賜之

賜杯讀書堂

成廟內府蓄水精杯一雙稀世絕宝華使鄭同見之

欲得其一上以祖宗舊物不許一日宣醞于銀臺出
圓杯使斟之諸臣到手輒傾不覺醉倒成覘性不飲
酒令吏點茶急瀉熱湯中忽拆裂以方杯賜書堂下
教曰非欲使爾等沈湎用以示予珍重之意時姜渾
申用漑金駟孫在書堂謀壽其傳臺金而鏤銘曰清
不涅槃能受德其物思勿負每法醞至例訖宣杯一
巡即置匣藏中宗朝又賜仙桃杯明宗朝又賜琥珀
杯沈守慶作謝箋曰與水精仙桃而並傳于成宗中
廟而益顯鄭惟玄寫此句於堂中

遣承旨問疾

中廟三十八年金安國病篤上遣承旨問疾政院以
非三公遣承旨無故例為言上曰金安國雖非三公
盡心國事其特遣承旨問之及卒悼惜之賜賻祭加
等

尚震醉仆

明宗朝嘗幸後苑賜侍臣酒尚震素不能飲醉仆道
左下教曰相臣在路傍過行未安命以帳障圍而後
進輦

盡進陶山精舍

李滉退居禮安屢召不起上以招賢不至難為題舍

近臣賦之又命礪城尉宋寅使畫所居陶山精舍又書滉所作陶山記及詩篇作屏風以進常置寢殿中

撰聖學十圖

宣廟朝李滉自先王朝屢召不至上畫誠招致擢置貳公滉感激知遇撰聖學十圖西銘考證手寫程子四勿箴以進上命皆繕寫為屏置諸左右朝夕觀省不時召對逆容講道及卒傷悼不已下教曰滉之片言隻字皆可傳後其令有司裒集刊行

大臣遭憂恤典

宣廟癸酉盧守慎拜相甲戌辭遯以玉堂劄子還仍

戊寅命賜其母食物辭違又以政院玉堂及大臣所
啓仍任及遭母喪歸葬時以日寒解所御貂裘賜之
又賜雨具胡椒丸藥命內醫隨行承旨宣旨仍命一
路護喪本道給役夫發引及反虞再遣承旨慰問癸
未八月方在禪服中而命注書以備忘來宣曰卿大
臣也雖在守制之中不可膠守常規卿其卜相以進
以附廟下鄉命內醫隨行服闋翌日卽拜左議政甲
申承召入京亦遣承旨宣醢於漢江因與舡遊以解
淫鬱

思庵喜牛翁登朝

宣廟十三年以成渾為掌令諭召不置又下教曰此
人有病不可冒寒給馬輜上來及拜命禽起坐曰欲
見顏色勿為俯伏又以辭陳絕糧特賜米豆曰周之
則受古人之道可勿辭朴淳聞渾承命入城喜語人
曰吾王不亦為豪傑之主乎密密結綢畢竟能綢得
牛翁來渾號牛溪故云

賜物大臣母

宣祖朝洪暹以有九十偏母上賜札曰卿元老耆德
為邦家柱石又有九十偏母特賜卿母米豆酒肉以
示予意

肩輦入闕

仁祖元年命依宋朝文彥博古事李元翼五日一朝以肩輦入闕又使小宦挾上殿孝宗辛亥教曰鄭領府事太和久未相見深用缺然欲為相接聞其有脚疾須肩輦以入命除甫拜出入使內侍扶掖上殿顯宗九年賜金尚憲肩輦

禮賢

仁祖即位之初張顯光金長生朴知誠等卽駟召命乘駕輜或別設司業以授之或擢置憲府之職且開講學廳使之訓迪世子祿俸之外廩人徃粟其退也

令長吏歲時存問

小學誘解

中宗十八年命印小學誘解宣布中外先是廷臣金安國白上曰治道以孝悌為先而其教之之方莫切於小學且先王既撰三綱行宗以教四方請加長幼朋友為五倫行宗廣布中外至是命印布小學誘解使閭巷婦孺皆得以知之

勸鄉飲酒禮

中宗二十一年教八道觀察使曰承宣之任敷民彝敦禮俗使一道皆知孝悌之行長幼之序而近來任

此責者類以簿書為急不究其本源教化陵夷風俗
頽靡可勝歎哉鄉飲酒禮尊高年尚有德習敬讓之
風絕暴亂之萌鄉其詳考禮文以時而行使知尊卑
長幼以化民成俗

讀約

李珥與鄉人有志者議行鄉約以正弊習乃將呂氏
舊法更為叅酌增損節目要以宜於今俗而不背古
制又定會集讀約法每間一月講約于書院設夫子
四聖及周子二程朱子位於講堂至者皆再拜仍拜
文憲公廟即崔冲祠在海州畢行禮見之仅於堂上

遂讀約文講論而罷又於野頭村畧倣朱子遺意設社倉春秋歛取二分之息以救士民艱食者仍作約束其條列視鄉約加詳以便庶民且有講信位次等儀海俗初甚渝薄自是以後文風丕變禮俗成習雖村里愚氓亦知感化或有棄妻數十年好合如初者又有庶人老者喪服衰哀痛過常問之皆曰此李監司之教也蓋珥曾有惠政於本道故州人云然

旌孝烈

孝宗六年旌中外孝子烈女六十餘人閭閻或贈職復戶以礪頽俗

子死父喪妻從夫死議

李願命子死父喪妻從夫死旌閭議曰親喪而滅性夫沒而從死要之過中而非禮意官之疑於旌褒蓋慮其激勸而多傷人之生矣然諸大臣之議皆以爲寧勉其不及不可抑其過者誠合於扶衰教研頽俗之道臣無容別議

召吉再

定宗二年召前朝門下注書吉再授奉常博士再上書曰女無二夫臣無二主乞放歸田里以遂不事二姓之志上嘉其節義優禮以遣命復其家世宗朝贈

左司諫英宗朝謚忠節

享鄭圃隱

宣祖癸酉將以鄭夢周享崧陽書院有司以位版爵號事上稟上曰夢周高麗人也宜肯受本朝官爵雖有領議政之贈只書圃隱先生可也圃隱夢周別號也後又下教曰予嘗讀文山指南錄悲涼慷慨不忍終篇夫文山夷齊後一人而已為萬世人臣之表準我國鄭夢周節義文章可與文山儷美其文集印出刊布中外英宗壬子致祭于高麗忠臣鄭夢周舍祭文稱公不稱名

善竹橋詩

英宗庚申駕行松都過善竹橋臨橋止金以示敬賢
之意下御製詩及小識命豎碑建閣于橋傍又命大
提學吳瑗記其碑陰其詩曰道德精忠亘萬古泰山
高節圓隱公

忠臣之像移摹於忠臣之宅

英宗辛未龍仁忠烈院儒改摹受周畫像于京中掌
范署蓋以故忠臣成三間舊宅也因領府事金在魯
所奏將致祭而以忠臣之像移摹於忠臣之宅事甚
奇異特命故忠臣吳達濟玄孫承旨彥儒卿命賜祭

徐甄遜居詩

太宗十二年前朝掌令徐甄遜居矜川嘗作詩曰千載神都隔渺茫忠良濟濟佐明王統三為一功安在却恨前朝業不長大臣臺諫請黜治上曰高麗之臣不忘其君乃其情也吾李氏豈能與天地無窮哉倘李氏之臣有如此者可嘉也其直勿問群臣固請上曰甄不北面我家延慕其君是亦夷齊之流何可罪之宣廟朝因筵臣許筠言致祭其墓贈大司憲

咸興差使

太祖晚年有豐沛之戀禪位世子幸北闕不肯回鑾

朝廷每請奉還而不得請前後使者十輩皆不得還
此所謂咸興差使也判承樞朴淳慷慨請行至咸興
遙望行宮故以子馬繫于樹騎母馬而行馬回顧躑
躑不能進及上謁淳上王布衣交也懽然道故款待
仍問曰繫子馬于樹何也對曰妨於行路故繫之則
母子不忍相離雖微物亦至情也因涕泣嗚咽上王
亦汪然感涕一日與淳局戲適有鼠啣子墮屋至死
不相捨淳復推局伏地而泣上王戚然即諭回驛之
意淳辭敝上王曰亟行而已行在諸臣爭請殺之上
王不許度已渡龍興江而授使者劔曰若已渡江則

勿追淳偶得暴疾尚在船中未離岸遂腰斬而還上
王大慟曰淳死何言使者對曰但北向行宮呼曰臣
死矣願毋改前音上王流涕曰淳少時良友也予不
食時昔之言遂回鑾太宗問淳之死驚慟軫恤有加
命畫工畫其半身以著其宗

抗義新編

安邦俊編趙憲遺藁曰抗義新編因題後曰撮其中
請絕倭舉義兵疏章書檄附以碑文言行別為一書
名之曰抗義新編既又拙得八事令畫手李澄寫以
為圖置之卷首俾觀者目擊而思存雖愚夫愚婦亦

得以聳慕而興起焉老泉所謂像亦不為無助者此也

孝廟誦圃隱詩

寅平尉鄭齊賢嘗言孝宗大王每於月夜朗詠其先祖文忠公鄭夢周丹心歌輒悲涼慷慨擊節感涕曰白骨成塵魂有無而尚不改心千古安有此老精忠不朝峴

英宗十六年駕幸松京過不朝峴問侍臣以命名之義對曰太祖設科本道時前朝大族五十餘家不肯赴舉故以為名教曰末世君臣之義掃地盡矣今聞

不朝之名雖百世之下猶令人凜然如覩也遂親書
不朝峴三字豎碑于其下

罷寺刹

世宗五年大司憲河演等上疏曰瞿曇棄君父辭爵
位歷代酷信廣立精舍施土田納梵宇中外分屬田
一萬一千一百餘結同胞赤子未免餓莩遊手徂流
又何給田以優其養乎上是其議京外只留三十六
寺餘悉罷之成宗二年教曰祖宗朝巫覡不得居城
中近來禁令漸弛或有雜居者其亟出諸城外又禁
都城中念佛所

拜佛

世祖嘗語徐居正曰人君於佛可拜否對曰昔宋太祖幸相國寺問當拜与否僧贊寧曰見在佛不拜過去佛太祖笑而不拜然則人君不拜佛正也拜佛權也

不受僧施食

成宗十二年上幸陵仍拜影殿于奉化寺寺僧欲餽百官工曹判書魚世謙曰堂堂扈從之臣受僧施食於國體何上曰任爾不食世謙與諸官獨不食

斥閻羅之說

纂尊錄曰金叔滋嘗教人云佛家所謂閻羅王者苟有之殺人父母其暴已甚為子者所當決黃泉而求報其讎不得則刻其像立諸庭出入射之以終其身可也今世俗無知非徒不以為讎必盛其齋供而啗之是何義也

毀淫祠

南致勤為慶尚兵使踰鳥嶺驛卒擁馬向山坡曰此地自古有國祀神堂往來使客商賈皆拜跪祈禱然後乃行致勤直到祠前命悉撤毀祠宇撞碎彌勒又命聚嶺底村家千手鍾掘渚祠宇基趾為池澤頃刻

而畢遂行上營竟無病後巡列邑時凡非禮神祀及
路傍聚石叢祠掛紙錢懸馬鬣處一皆夷之無片石
淫祠之風遂寢

聖痘遠巫祝

肅宗九年上患痘外間傳宮中將迎巫送神時明聖
大妃寢疾后弟金錫翼錫衍等請禁之大妃驚曰宜
有是耶遂召女官之掌宮中事者詰之仍教曰毋擅
作擾亂

禁僧徒入城

定宗元年禁僧徒出入城內舊例雖有此禁而僧徒

時：往來城圍每歲首三日則輒托以齋米差下限
三日往來無禁至是并為嚴禁自是僧徒不敢輒近
城圍

五禮儀

世宗十二年命許稠等詳定禮儀採洪武舊制及東
國儀禮纂五禮儀姜希孟序略曰我世宗大王命詳
定諸祀序例及古禮又命詳定五禮儀末及施用世
祖大王依世宗朝所定名曰五禮儀附于徑國大典
禮典之末書未脫儀我殿下命諸臣撰定俾完斯事
其要則古凶軍賓嘉五者已而更歷數聖人揣摩之

功極其精密制作之盛當與周家儀禮一書並傳不朽也初世祖命申叔舟叅酌更定之李恒福嘗言五禮儀規模節目廣大該洽曲盡旁通其於諸禮雖不知一一盡合五禮而至於凶禮必出倉卒若非五禮儀急遽之間安得有所折衷哉况善處極多有非常情所到中文忠可謂魁傑異常也英宗二十年續編成藝文提學李宗城為增修堂上主之尹光紹為郎廳

喪禮補編

英宗三十四年上以喪制復古之後與五禮儀所載

多有不同。命諸臣纂輯，名曰《喪禮補編》，仍命刊行。有御製序。

李廷龜請成昭代典則

史臣曰：李廷龜考出宗錄彙為一書，之論甚好。亦有許令施行之文。而今其書不傳，宜此事因循猶未之成歟。抑書成而見佚於丙子之亂歟。此既不可攷，而自後至今更無續請而卒成之者，惜哉。

鑄字

太宗三年，教曰：為治必須博覲典籍。吾東方在海外，中國之書罕至。板刻易剝，且難盡刊。天下之書予欲

鑄銅為字隨書印之以廣其傳乃以古註詩傳左氏
傳為字本始鑄多至數十萬字名曰丁亥字有大提
學權近所撰跋世宗二年以其字大而不正特命改
鑄新鑄字樣極為精微名曰庚子字印者便之有大
提學卞季良所撰跋十六年又命出經筵所藏孝順
事順為善陰陽論語等書為字本比庚子字差大二
十餘萬字字體最好又命世祖大王書綱目大字範
鉛為字以印綱目即今所謂思政殿訓義也有直提
學金續所撰跋文宗二年改鑄庚子字命安平大君
書之名曰壬申字世祖即位改鑄壬申字命姜希顏

書之名曰乙亥字十年欲印圓覺注命鄭蘭宗書之
名曰乙酉字成宗二年用王荊公歐陽公集字鑄之
名曰辛卯字又得中朝新板綱目字鑄之名曰癸丑
字命芸閣印之無書不印

命刊文集

宣祖十八年命刊布文天祥方孝孺鄭夢周文集命
盧守慎作序文又命刊行岳武穆精忠錄命柳成龍
作序文

訂周易設廳

宣祖三十四年設纂集廳商訂周易句讀音釋命聚

中外儒臣釐正鄭逮洪可臣韓百謙三人以未出身
與選時以為榮天安郡守康復誠亦以校正事內遷
召還又以安城郡守金長生差校正郎不赴

選東詩設廳

宣祖三十八年設纂集廳選東國詩文李廷龜時為
畿伯本廳啓李某不可不忝雖外官常在都中請破
格為堂上從之

頒諸書

仁祖初三經及諺解心徑近思錄給兩界小學因李
廷龜啓廣布中外固禮賜廷臣顯宗朝北伯閔鼎重

啓請諸書下送遠方肅宗朝下貞觀政要于政院

校書館

趙翼曰本朝右文為治京中置校書館天下之書次第印行而外方州郡刊刻諸書無處不有所以書籍流行布在世間士苟有願學之志者求而取之各得其所願如飲河者各充其腹士之生於是時者其於為學豈不易哉

小學重刊

顯宗七年左議政洪命夏上劄子言元子今當講小學矣故相臣李恒福嘗以文成公李珣所為小學集

註獻之付訓局印頒而舊本諺解與集註多有遲滯
請令禮曹問于儒臣依文成集註纂定諺解焉上命
議于大司憲宋浚吉浚吉如命夏言於是使弘文館
釐正

大字九經

顯宗以眼患艱於看書令玉堂寫進四書五經大其
字樣以便覽閱

濟州藏書

肅宗二十六年領議政徐文重啓曰濟州乃是兵火
所不及處公私書籍自古有藏置之規而中間廢闕

而不行者久矣卽者濟州牧使報于本司以為海外
書籍甚少請得大典無寃錄律文等冊云此則自當
交付有冊板處使之印送而自今以後每於書冊印
出時自校書館印送一件於濟州以為藏置之地似
好矣上從之

木板鑄字之辨

李晬光類說曰鑄字印書創自本朝非中國所有也
自宋後以刻木為難多用活字而考校不審易致訛
誤可恨聞祖宗朝凡書籍有誤者監印官輒杖之故
絕無錯字且中朝冊板以梨棗雜木為之而我國則

惟用梓木故板子甚難刊布不廣乃我國之拙處也

劉玄子說東國冊子

胡應麟甲乙剽言曰劉玄子從朝鮮還言彼中書集多中國所重者且刻木精良無一不做趙文敏惜為倭奴殘毀至圓圖之間往往以書幅拭穢亦典籍一大厄也因曰不忍見每命部卒聚而焚之云謹按玄子即劉黃裳字萬曆壬辰以兵部員外郎拜賢畫主事出來

購綱目

象胥故事曰中廟朝譯官李和宗赴京時弘文館令

購來綱目而禁嚴不敢質諸書肆禮部宴日和宗呈
文于大堂仍為口陳引不道古今馬牛襟裾之說反
覆論列言若懸河大堂大加稱賞即題本許質

大明會典辨誣

宣祖二十二年陪臣尹根壽回自京師帝賜大明會
典一部會典即太祖高皇帝洪武間所纂典禮也其
錄本朝派系處被誣誤錄本國有太宗三年陳奏辨
証特蒙許改而因循未獲刊正至是因重撰會典屢
使袁顯快蒙鑄改將新刊會典一部順付尹根壽以
來

羣書求來

仁祖二十六年禮曹啓杜氏通典文獻通考書甚有
裨於儀文考閱請令戶曹給價於節使之行從便買
來許之肅宗三十九年金昌集尹趾仁等回自燕京
賞來全唐詩古文淵鑑佩文韻府等書景宗三年密
昌君楫徐命均等賞來周易折中朱子全書等書英
宗五年賞來康熙字典性理精義詩經傳說彙纂音
韻闡微等書正宗二年李殷徐浩修等購來蜀書集
成一部五千餘本

石齋筆談

姜紹書韵石齋筆談曰朝鮮國人最好書凡使臣入貢限五六十人或旧典或新書或稗官小說在彼所缺者日出市中各寫書目逢人遍問不惜重直購回故彼國反有異書藏本也余曾見朝鮮所刻皇華集乃中朝勅封使臣與彼國文臣唱和之什鏤板精整且重紙精潔如玉海邦湘帙詢足稱奇

朱彝尊文

朱彝尊吾妻鏡跋曰外國惟高麗人著述往往流入中土若鄭麟趾高麗史申叔舟海東諸國記以及東國通鑑史畧諸書多可攷訂

古文孝經

宋三朝藝文志曰古文孝經世不傳歷晉至唐所行
惟鄭氏者世以爲鄭玄唐開元中史官劉子玄證其
非鄭玄者十有二諸儒非子玄之說天寶中玄宗自
註元行冲造疏授學官凡令儒者傳習爲五代以來
孔鄭二註皆亡周顯德末新羅獻別序孝經即鄭註
者皇朝咸平中今祭酒邢昺取行冲疏刪定正義行
爲謹按華人之稱東國者混稱羅麗周顯德中則當
作高麗

朝鮮志

清兵部尚書鍾音所纂浙江書目云朝鮮志二卷朝鮮蘇贊成所撰嘉靖間侍讀華察奉使時其國令贊成為此冊以獻備載國中山川古蹟風俗末有姚咨跋按嘉靖己亥華察之來顯世讓為遠接使

中朝求觀東國文籍

肅宗四年勅使侍衛噶等求觀東國文籍賞去石洲權輿挹翠軒朴闇荷谷許紉玉峯白光勲蘭靈軒金誠立妻許氏圃隱鄭夢周等集及正氣歌桂苑筆耕史畧古文真實及近代墨刻法帖東人科體表賦詩論十二篇又求各體文大字真草差出製述官十四

貧能書人八貧製書以贈三十九年因勅肯求觀東國詩文令大提學抄出前後東人詩文刪定印出以十五本二帙順付謝恩使臨昌君焜入送

華史中記東事

史官曰中國書籍之詮錄我東事者甚夥既異本國之所記載傳聞差爽處間或有之而其為東國文獻之一助則審矣亟敢廣加搜剔同編於本國藝文考以備一說凡七十七種

方言解九經

新羅薛聰以方言解九經又以俚語製吏札行於官

府公簿刊世采曰我國經書口訣釋義中朝所未有
始發於薛聰成於鄭圃隱稚陽村至世祖朝分命諸
臣著口訣而然猶人各有書紛紜穿鑿又至宣廟朝
設局命官參互去取著定該解遂為一代之典可謂
盛矣但其口訣似亦當以中朝所定句讀為準而今
乃務加割斷使口訣釋義混然相雜無所準則恐亦
不得不再修者也又曰諺解又蓋炙門至退溪李滉
合成釋義猶未盡顯於世栗谷李珥乃就四書著諺
解以便學者受讀蓋時國家未及設局定著經書諺
解故耳

青丘風雅

文忠公金宗直所著青丘風雅云東人詩其格律無
慮三變自羅季至麗初專襲晚唐麗人中葉專學東
坡迨其叔世益齋諸公稍變旧習裁以雅正其間識
風教形義刺開闔抑揚深得性情之正可以頡頏於
唐宋模範於世者亦不少金快軒台鉉崔倪山瀛趙
石礪云仵各有遜集石礪快軒畧雜惟倪山之編類
為體

東方之文符

成俛曰金富軾之不華鄭知常之不揚李奎報之不

歛李仁老之不敷林春之不潤李齊賢之不藻鄭道
傳之不檢世稱牧隱為集大成詩文俱優為東方之
文符

文體

世宗始設集賢殿延文學之士河仲章長於對策疏
章而不知詩柳太初天才夙成即其覽不傳李伯高
清穎苔蘚然惟朴仁叟為集大成崔寧城精於四六
李延城能為科朶之文惟申高靈文章道德一代尊
仰徐達城文章華美金永山雄放豪健姜晉山詩文
典雅李陽城詩文俱美我伯成任氏得晚唐體金福

昌為文老健

金時習書

金時習與柳宸陽書畧曰僕生孩八月自能知書三
歲能綴文作桃紅柳綠三春暮珠貫青針松葉露等
句五歲讀中庸大學於修撰李季甸門許政丞稠以
老字為韵僕應聲曰老木開花心不老英廟命知甲
事朴以昌試之指壁画山水箇僕應聲曰小亭每宅
何人在傳旨待年長將大用賜物還家十三詣大司
成金泮門下受詩書春秋既而英廟顯廟相繼賓天
先廟之初故旧喬木盡為鬼簿遂伴髡者遊山水今

聖上登極異欲並仕曰知已沒新知未慣孰知余之
素志故復放浪於山水間矣

思政殿訓義

世宗十七年上命尹淮權蹈僣循聚文臣四十餘人
於集賢殿撰通鑑資治訓義親加讎正或至夜分書
成賜名曰思政殿訓義初上留意於資治通鑑患箋
註未盡句讀不明據胡三省音註及原委集覽等書
刪潤之又旁採他意以補之輒註本史全句或書句
字於句下以便口讀謂淮曰近日看得此書頗覺讀
書有益聰明日增眠睡頓減也

治平要覽

世宗二十七年上謂鄭麟趾曰凡欲為治必觀前代
治亂之跡自周以降代各有史然編簡浩穰未易遍
考大抵人之於學博覽為難況於人君幾政之暇其
能博觀乎卿其考閱史籍其善惡之可為勸懲者撰
次成書以為後世子孫永鑑吾東方興廢存亡并令
編次於是聚文學之士數十人于集賢殿分科責成
命世祖鑑之書成賜名治平要覽

歷代兵要

端宗二年歷代兵要成初世宗使鄭麟趾俞孝通李

石亨等蒐輯歷代攻戰事蹟始自黃帝迄于國朝附以先儒之論首陽大君摠事至是書成上之命武舉并試兵要

諸書類聚

世祖十一年又命申叔舟等十二人各率郎廳一人撰諸書類聚凡十二門曰易曰天文曰地理曰醫曰卜筮曰詩文曰書法曰律呂曰農桑曰畜牧曰譯語曰籌法

東國通鑑

睿宗十五年東國通鑑成先是世宗嘗命輯東國歷

代事案附以東儒之論為東國通鑑未就上命大提
學徐居正等續成之至是進獻上覽而善之曰可垂
萬世也然權近之論有不然者何為採入也居正對
曰司馬遷之論班固非之司馬光之論後人亦非之
金富軾之論權近亦非之史論固不可畫一也上以
為然賞賜堂郎有差

春秋類聚

宣祖三十四年下教于政院曰亂前欲以春秋例綱
目之制以左傳為目以胡傳為發明方繕寫一二卷
而遭亂中輟予每恨之今可依前式寫出以就予志

但其卷帙頗多必多書寫人然後可以速完又必使
遽於春秋者彙分類聚詳加證正俾無差謬

經旨兩存之

宣祖嘗於廷筵與柳希春論經書吐釋希春奏曰東
方自古未有咀嚙經訓沉潛反復乎朱子文語如李
滉者也臣謫居時用十年之功研窮四書有所論及
見李滉之說相合者十七八滉之經說甚為精密雖
或千慮之一失然不害其為得處之多也又李珣有
大學吐釋臣曾與珣在玉堂說及大學語契合以此
今亦將取來大槩臣立朝之日欲博聞廣取俟退休

閑暇斟酌誕長成書輒當送獻但折衷甚難上曰若
到兩說俱不可廢處可兩存之朱子於或說亦兩存
之此可法也

獻芹錄

柳希春謂人君之學尤貴知要小學近思錄四子乃
聖學之總會而帝王之規繩但其間先賢之言多引
而不發故希春稽考衆說參以己意凡可以發明羽翼
者一一纂入爲六書附註二卷拜剞以獻歷代名
賢奏議撮其最切於君道者爲一篇曰獻芹錄

東人詩集之盛

天將楊徑理鎬要見東人詩集覽前朝人詩選以為
文氣太弱不好云又朱天使之蕃見崔慶昌白光勲
詩集歎賞曰當故梓江南以誇貴邦文物之盛云

歌曲

明廟朝折御苑黃菊賜玉堂官命撰進歌詞倉卒不
能就時宋純以宰樞直總府乃借製以進上覽之驚
喜問誰作此者玉堂官不敢隱以京對乃大加賞賜
其詞至今傳于樂府云我國歌詞雜以方言故不能
與中朝樂府比如近世宋純鄭澈所作最善而不過
膾炙口頭而止長歌則感君恩翰林別曲漢父詞最

久而近世退溪南冥歌宋純僥仰亭歌白光弘閔西
別曲鄭澈閔東別曲思義人曲續思義人曲將進酒
詞盛行於世他如水月亭歌歷代歌閔山別曲古離
別曲南征歌之類甚多

前朝秘史

李時光曰余為內翰因曝曬得閣地庫諸書前朝特
秘史積在者甚多有海東金鏡錄一卷乃李齊賢等
所撰未克成書者而紀年頗有可觀又鄭愔李詹等
所為史稿即家藏史草也書事詳悉天灾時政直斥
無隱蓋首又直書姓名其事近古可喜云

壬辰後修史議

宣祖二十五年倭亂去邠時一史官焚史草逃去故即位以後時政記蕩然無存二十年間嘉言善政無憑可書仁祖朝令大提學李植洗補始克成編李恒福啓曰得失行在一時是非定於萬世自古國家所以重史官以記一時之得失以待萬世之是非故國可亡史不可闕雖在搶攘顛沛之日尤謹於載筆之事近日就考館上日記則壬辰一年全然不記癸卯乙三年閏錄者多至十朔而其時史官姓名亦無載錄之處憑考追修其道無由至丙申丁酉戊戌己亥

四年之史一年之內闕而不修者多者八九朔小不下四五朔今若因循放過則朝鮮終為無史之國而後之論者於今日得失成敗之迹徵之無據事之寒心無大於此而事係秘閣非外人所得以知者故悠悠九年尚不為朝廷一大舉措是亦恆事今欲釐正茫然散漫未易就緒若又悠久則其勢將至於湮沒而無傳壬辰一年左右史不備或以叅上兼春秋人負樞行史官之事其時秉筆人負一一查考督令追修癸甲乙三年間史官姓名職次日月先後令吏曹查出或考他可考文字本頁雖在外任或閑散哀疚

之中并令追修丙申以下四年間史官姓名憑考有據一一查出刻期追修何如

仁祖朝改修宣祖宗錄

仁祖元年命改修宣祖宗錄初李恒福李廷龜等擬定宣祖宗錄及李爾瞻用事以李山海為總裁盡剗初稿改撰宗錄顛倒是非故有是命

時政記

肅宗二年兵曹判書金錫胄延啓史官時政記甚為草率修史之時無所考據各司草記則皆載於政院日記而啓目么事則無載錄之處今後則使六曹及

他司有兼春秋者其日大段公事可為後考者一
抄錄月修送于政院備邊司則文郎廳義禁府則當
直都事次知亦如六曹兼春秋之為則似為著察矣
許積曰令翰林亦於緊關公事啓下之日抄錄置之
與六曹兼春秋月終所呈文書為準則似無遺失之
弊矣從之

史庫

李晬光曰我朝宗錄平時內則春秋館外則忠州星
州全州等處分藏而壬辰兵燹後惟全州者獲免移
置於江華至癸卯年設局印出累件分藏于江華及

妙香山太白山五臺山其慮患之意益深遠矣

赴京却僧道於班序

隆慶三年宣祖二年柳成龍以聖節使書狀官赴京
師將入班序班引僧道二流序於前列成龍謂序班
曰吾輩以冠裳之人不可立於僧釋之後序班言於
鴻臚引却二流置後廷中動色初赴京使臣於禮部
有見堂禮鴻臚則無之隆慶初始重其任以文官為
鴻臚卿禮應相見而使臣只依旧例鴻臚怒貶使臣
班令序於僧道雜流之下己巳朴承任呈禮部論辦
立班如初光海庚戌鄭廷世至京師譯官購得大明

集禮興序班爭辨禮部一依集禮位于文武班之東
後遂為例

陪臣許入正門

宣祖五年遣右議政朴淳如京師賀登極故事外國
進奏者率令由挾門入淳爭之曰陪臣出入既聞命
矣若表文則奏御至尊豈宜由挾門禮部不能難許
入正門遂為定例留館日禮部問開市對曰寡君無
所貿貨開市何為華人稱朕

詔使到境變禮

尹斗壽曰常時詔使之來本國例有留詔節次殿下

親於天使前懇留家丁叩許魏天使頒詔而來行到
嘉山聞明廟不意薨逝即於路上卓出留詔一節以
今上方在權署之中令大臣率羣臣請留為慶禮也
萬曆元年韓陳天使之來本國初不詳權署時慶禮
之由一以丁卯年留詔儀節為儀注送之韓陳亦不
知源委因襲慶禮而行之極為未安後日禮官不可
不知

親年七十不赴使

旧例赴京使臣有父母年踰七十者則曾有陳疏乞
免之規後有金誠一差書狀官其父年已七十八

矣誠一欲援例陳免馳書稟告于其父則父答曰我
雖年老今幸無疾病汝既委質義不得顧私無以我
為念頃速赴君命也誠一遂不敢辭人以爲難

黃髯宰相

永樂十八年右議政李原奉使如京師姿相魁偉巍
然萬人中成祖皇帝見而奇之曰黃髯宰相後頃復
來

武臣奉使

世祖朝幸溫陽聞憲宗皇帝登極將遣賀使三么例
爲止使持京師路梗難其人申叔舟進曰韓明澮出

使具致寬年老臣請行具致寬曰叔舟首相臣在下
當行上特以黃守身為正使奉石柱為副使守身啓
曰臣既非文臣石柱亦武人請得一文官為价於是
以西河君任元濬為副使即日拜辭夕至栗峰驛夜
半中使急傳上命曰任元濬予方任使不可遽行以
金禮蒙代之旧例赴京使臣中葉以前或以武臣差
送以文獻所及處言之世宗丁卯庚午成勝連為副
使成宗甲辰光原君金伯謙為賀正使丙午石尹李
季公為賀正使丁未卞宗仁為陳慰使中宗初同中
樞趙覽範為聖節使辛未同中樞李允儉為賀正使

己卯兵曹叅判朴英為聖節使乙酉清溪君鄭允謙
為聖節使庚寅同中樞吳世翰為賀正使甲午同中
樞李享順為謝恩使明宗丙午同中樞張世豪為聖
節使己酉兵使李思曾為聖節使此外無聞大臣不
入此中按魚得江文有曹潤孫再聘幽燕之句似在
中廟朝而年條未詳

獻建州捷

世祖十二年以皇命遣魚有沼等擊破建州衛遣魚
世謙等獻捷于京師到遼東三大人為之設宴世謙
揖而不跪御史云何不跪飲世謙對曰我奉國命來

朝京師諸大人特設宴慰我，安得跪飲御史不能
難

質正官

成宗三年遣成任賀正于京師其弟倪以藝文館修
撰拜質正官隨行人以為榮燕山特李昌臣以正使
赴京其子顯以檢詳拜質正官隨行中宗癸巳任樞
以冬至正使赴京其子虎臣以說書拜質正官隨行
一代名流贈詩以鳳將雛比之

德宗延崇奏請

成宗六年遣左議政金礪于京師請延崇所生父母

帝降勅曰得奏王所生父諱先封世子早逝及所生
母韓氏見在俱未有名號雖為人後者義不可顧私
親然顯揚之義自不能已等因具悉王之孝忱茲特
封故世子諱為朝鮮國王謚懷簡封韓氏為懷簡王
妃以遂王顯親之志

使臣遊觀出入

明宗丁未因謝恩使宋純呈文礼部聽附近所在同
書狀官及從人二三名遊觀出入金安國送人赴京
序曰余旧嘗忝承上朝時見從行者出入無禁或質
礼叩疑於先覺或貨訪書籍於市肆或縱觀皇都文

物之盛而以廣其見聞或薰炙中華道義之風而以
資其學習蓋知皇朝懷綏之無間有異他邦似聞近
歲以來使于上國者峻禁出入有若拘囚然與女真
蠻獠獫狁無異豈我國之使愆礼失檢違犯儀導而
然歟或者掌故者未察歷朝恩遇之至意而偶見於
一時之見歟若使是令久行而不復于旧則愚恐東
國之士目昧而耳塗無復望於薰風進德霑皇化而
革僻陋也後安國奉使朝京多購性理諸書及古今
表邈曰我國事大表牋為重而儒士不務學每當製
述多窘故表邈并購云

迎恩門

中宗三十四年募華館前路上旧有紅箭門嘉靖十五年相臣金安老以爲迎送王人事體欠敬改立孤柱一間門扁曰延詔至是天使薛廷寵謂延有詔勅賞但名延詔似偏寫揭迎恩門未知薛額毀於何時而今則以朱之蕃所寫字揭額

梅燕晷

中宗朝蘇世讓文曰翰林院侍講華察嘗奉使東來其後權判尹機朝京師及還仍進侍講所獻梅燕晷族各一軸自上下于政院命爲歌詩記其顛末而進

之蓋梅開先百花清高之樹也燕春來秋去有信之禽也願得如燕之去來以仰望我聖朝之清光也云

西伯迎勅

旧例平安道觀察使迎送華使于安州仁祖元年依龔用卿使朝鮮錄迎送于義州義順館

東使優待

嘉靖間趙彥秀以聖節使赴京師礼部尚書邀致私第曰人臣義無私交愛君德容越礼相見因贈以四書口訣鄭惟善以謝恩使到北京日本使臣亦同寓在所居之館欲與我國使臣序班次及入朝廷不使

之同日焉

華使之賢

隆慶元年明宗二十二年帝遣翰林院檢討許國兵
科給事中魏時亮領登極詔乃賜綵幣行到嘉山聞
有國恤含淚謂譯官曰前所未有之事吾等適值殊
為不幸仍問國王有子乎對曰世子夭歿無他嗣矣
又問首相何如人對曰李浚慶賢相也國人信之兩
使曰無虞矣即使舍人俞深托以問喪禮賁題本先
入都察欲偵探也及至都上以權知國事具世子冕
服出迓于幕華館終始無違禮兩使注目歎曰這等

少年動遵禮節東國之福也使行事外以白綃圍領
別行吊禮自國朝以來華使之賢以許魏為最云

皇朝遣太監封王

許筠曰皇上立極皇長子誕辰頒詔于本國用翰林
科道有故則或郎署行人吊祭亦用行人本國封王
封世子則用內官內官奉詔是大恩典中國親藩之
封亦不許而我國獨得之云我國入朝宦者乞於帝
前而奉詔東來因為定規本國宦者金英選入中朝
為司禮監太監有寵於憲宗不肯奉使本國曰吾豈
敢抗禮於吾國王乎

天使一代名人

中國奉使于我者自倪文僖譙陳緝熙鑑董圭峯越
唐紫陽舉俱以一代名人不得入閣故翰林當使者
最避之丁卯穆宗登極當頒詔丁侍講士義范屏翳
應期連為辭避時許檢討國請行竣事而返後丁至
侍郎而早歿范栖遲省署晚為南祭酒又忤當路而
去許公已酉入閣官至少傅吏部尚書年七十而卒
李漢曰上國之使在東者必妙選髦士為從事凡唱
酬為文輒哀成皇筆集以張大之一時操觚之類無
不揚眉吐氣冀幸其執鞭而此路之斷亦百有餘年

矣

